



**TERTIB ACARA KEBAKTIAN MINGGU  
GKPS P.BULAN-RESORT POLONIA MEDAN**

**Minggu KANTATE , 10 MEI 2020**

**(Mandodingkon Haluahon na Humbani Tuhan)**

**Live streaming: [www.gkpspadangbulan.com/tv](http://www.gkpspadangbulan.com/tv)**

**Tata Ibadah: <http://www.gkpspadangbulan.com/tatib>**



**1. Votum – Introitus – Tonggo**

**P. Riap ma hita jongjong**

Ibagas goran ni Naibata Bapa, pakon Tuhan Jesus Kristus ampa Tonduy Napansing, sitompa langit pakon tanoh on. Amen.

Dodingkon nasiam ma la, dodingkon nasiam ma puji-pujian Bani, sahapkon nasiam ma ganup horja halongangan-Ni in. Marmogah-mogah ma nasiam ibagas goran-Ni na pansing in. Marmalas ni uhur ma sagala sipindahi Jahowa.

Haleluya, haleluya, haleluya.

**K. (mandodingkon Haleluya, haleluya, haleluya)**

**P.Martonggo ma hita!** Ham Naibata paridop ni uhur na tarsulur. Domma ipasirsir Ham haluahon ampa hagoluhan marhitei pangkopkopon ni Anak-Mu Jesus Kristus Tuhannami. Na so onnga niidah ni mata, na so onnga binogei ni pinggol, anjaha na so onnga tubuh ibagas uhur ni jolma, ai do ipasirsir Ham bannami janah ai do bona ni puji-pujian na idodingkon hanami ibagas uhur na martarimakasih hu Bamu sadokah goluhnami. Bamu ma puji-pujian sonari, ronsi sadokah ni dokahni. Amen!  
(*hundul kuria*)

**2. Mandoding 201 Puji Tongtong Jahowa Tongon (1+2+5)**

1. Puji tongtong Jahowa tongon  
pardear gabei parholong atei sadokahni in;  
pardear gabei in parholong atei in.

2. Ingat tongtong, ale tonduyhon.  
Ganup na jenges, ibahen Tuhan Naibata hubam;  
Dear layak-Ni do na pagoluhkon ho.

5. Sombah bujur Jahowa botul.  
Marhahormaton ma hita bai Tuhanta Naibata.  
Sai rap marsombah ma bai Tuhan Naibata.

**3. Mambasa Titah**

P.Tangar hita gantih ni Titah na sapuluh in, aima na tarsurat bani **Mateus 22:37-40**. Maningon haholonganmu do Tuhan Naibatamu humbani gokni uhurmu, humbani gokni tonduyumu, ampa humbani gokni pingkiranmu. In ma titah sibanggalan anjaha na parlobei. Na paduahon on pe dos do pakon in: Maningon haholonganmu do hasomanmu doskon dirimu. Titah na dua on do marimpun sagala titah pakon hata ni nabi-nabi. **Riap ma hita mangindo!**

**K.** Ham Tuhan Naibata, pargogohi Ham ma ahu mangkorjahon titah-Mu ai.  
Amen.

**4. Mandoding Hal 241 : 1-3 Malas do Tong Uhurhon (1-3)**

1. Malas do tong uhurhon, bani Jesus na tongtong  
mangindahi hajolmaon, ase la paluahkon  
Jolma manisia in, humbai hamagouan in

2. Malas do tong uhurhon, bani Jesus na bujur  
Pasirsirhon hagoluhan, bangku na ihamagouan  
Haganupan dousangkin, sai siasap Jesuskin

3. Malas do tong uhurhon ai parrupei au tongon  
Bani arta na maharga, pinarbagah ni Tuhanta  
Bai ganup na bujur in, mangirikkon Jesus in

**5. Hasasapan ni dousa**

**P. Riap ma hita jongjong**

Martonggo ma hita, sopotkon hita ma dousanta hubani Tuhan Naibata.  
Ham Tuhan Naibata Bapanami, Sitompa hanami pakon haganup isi ni dunia on. Dear do haganupan itompa janah iramotkon Ham jadi-jadian-Mu. Gariada Ambilan Na Madear na marisi haluahon ampa hagoluhan in pe isuruh Ham do ase isaksihon hanami hubani ganup na tinompa-Mu in. Ambah ni ai, hajengeson ni dunia na tinompa-Mu ronsi kelestarian lingkungan hidupnami pe iparentahkon Ham do ase ijaga, ihargai, janah iramotkon hanami. Bani ganup ondos-ondos-Mu in Tuhan, gati do lang martanggungjawab hanami

mandalankonsi. Hurang do gogoh ampa kemampuannami laho manramotkon ampa melestarohon goluh na madear in. Gati do lang barani hanami marpambahenan ase jongjong keadilan, pardameian ampa kelestarian lingkungan hidup i tengah-tongahnami. Bani haganupan in Tuhan, sasap Ham ma dousanami, anju, paruhuri, janah pargogohi Ham ma hanami ase marhitei hanami, kuria-Mu roh torsani goluh i tanoh on bahen hasangapon ni Goran-Mu, ampa malas ni uhur bennami. Ibagas goran ni Anak-Mu Jesus Kristus ipindo hanami on. Amen.

**P.Tangar anjaha haporsayai hita ma Hata ni Naibata, bagah-bagah pasal hasasapan ni dousa.**

Tongkin do hansa Hutadingkon ho, tapi marhitei holong ni uhur na bangga, patumpuon-Ku do ho. Sanggah pargajag ni ringis-Ku, Huponopkon tongkin bohing-Ku dompak ho, tapi marhitei idop ni uhur si sadokah ni dokahni, idopan-Ku do ho, nini Jahowa Sipaluah ho. **Ibagas holong ni Naibata, domma isasap haganup dousanta. Halani ai, pataridahkon hita ma tanda-tanda ni pargoluhan na bayu. Hasangapon ma bani Naibata i babou!**

**K. Amen.** (hundul kuria)

**6. Mandoding Mandoding 475 Ham Naibatanku (1-3)**

1. Ham Naibatanku i surga paratas-Mu manrogop au nuan ilobei-Mu. Tunggun tumang sangap do goran-Mu, 'ge kuasa-Mu totap do in toguh.

2. Roh au manowod martonggo hu lobei -Mu, unduk do au mangindo holong-Mu. Sai sasap Ham dousanku haganup, useihon Ham ma hu bangku layak-Mu.

3. Ham do hupuji tongtong bani tonggongku, marhiteihon goran ni Anak-Mu. Na dob jonam, pansing janah pintor, Jesus Tuhanku sigomgom hajojor.

**7. Mambasa sibasaon**

**P. Tangar hita ma Hata ni Naibata na tarsurat bani 5 Musa 31:14-22. Amen**

**Martuah do na manangar Hata ni Naibata anjaha na marimbagashonsi!**

**K : Amen**

**8. Mandoding 327: Marpangusandeian Bani Tuhan in (1+3)**

1. Marpangusandeian bani Tuhan in, puji sai pasangap ma goran-Ni in Monang halani hatani Tuhan in, mangarapkon parpadanan in Sai mangarap bani padan ni Tuhanta Jesus Kristus Sai mangarap ma hita bai partobusan-Ni in

3. Sai dalankon horja ni Tuhanta in, janah sai dingat ma bani padan in. Sai sirsir martonggo na porsaya in, Ai podas ma roh Tuhanta in. Sai mangarap bani padan ni Tuhanta Jesus Kristus Sai mangarap ma hita bai partobusan-Ni in

**9. Haporsayaon**

**P. Riap ma hita jongjong!**

Saksihon hita ma haporsayaonta in, songon na sinaksihon ni haganup halak na porsaya bani sab tanoh on!

**P+J. Ahu porsaya bani Naibata Bapa.....Amen! (hundul kuria)**

**10. Mandoding 116 Na Monang in Do Da Use Mangankon (1+2)**

1. Na monang in do da use mangankon buah ni hayu hagoluhan in. Lang boi be idahonni hamagouan 'ge hamateian paduahon in. Ai Naibatani hatundalanni mambaen langkahni tongtong torang. mambaen langkahni tongtong torang.

2. Na monang in da seng boi be kahuan, ni hamateian paduahon in. Sai jongjong do tong ia mangadapkon, bohing-Ku i nagori atas in. Sai diahonni ijin Tuhanni, 'ge hasomanni na monang in. 'ge hasomanni na monang in.

## 11. **Ambilan: 1 Kronika 16; 31-36 (Pdt.Jemmi Saragih,STh.)**

### **Kuria na hinarga ni Tuhan!**

Buku Pangungkabon martujuan patuduhkon haluahon na gok ibagas Kristus Jesus, na dob mantaluhon dousa pakon hamateian. Fokus buku on aima pasal pangarsikon (akibat menolak menyembah kaisar) pakon hasatiaon ni halak na porsaya bani abad parlobei.

Bani bindu 12-14 isahapkon do pasal parporangan haporsayaon pakon haluahon bani halak na porsaya. Ija ipatugah bahasa sipanukasi (Yun.diabolos—lbr. šātān) bani arian borngin (terus-menerus), lang marnasoh manukasi halak na porsaya. Agepe domma talu sipanukasi ai bani parporangan i nagori atas, janah idabuh hu dunia on. Horja ni sibolis igambarhon bani 2 Korint 4:4, *“Ai ipapitung naibata ni dunia on do pingkiran ni na so porsaya, ase ulang iidah sidea sondang ni Ambilan Na Madear pasal hasangapon ni Kristus, ai ma usihan ni Naibata.”* Sibolis in mambahen hita lang mangidah janah lang porsaya bahasa Kristus in aima usihan ni Naibata. Sonai homa bani 1 Petrus 5:8, *“Torang ma uhurnasiam anjaha puho ma nasiam, ai mawat-awat do imbangnasiam, sibolis in, songon singa na maraum, mangindahi sibondutonni.”*

Bani bindu 12:1-17, ipatugah do sonaha parporangan na madear pakon na jahat, parporangan ni Tuhan Jesus Kristus riap pakon halak na porsaya manlawan sibolis pakon hasomanni/dunia on. Parporangan ni sibolis pakon Tuhan Jesus Kristus ai ipungkah hun nagori atas ronsi das hu tanoh on. Ipatugah do bahasa malekat Mikhael mandabuh si Lucifer (sibolis) luar hun surga hu dunia on. Ibagas Padan Na Basaia, Mikhael isobut do selaku pemimpin pakon malaikat pelindung (guardian angel) ni halak na porsaya.

Tapi age pe domma idabuh sibolis in hun nagori atas, totap ope satia ia bani horjani aima manukasi halak na porsaya na dob manjalohon haluahon pakon hagogohon pakon harajaon ni Naibatanta ampa kuasa ni Kristusni. Lang ra maronti sibolis in laho manlawan Naibata marhitei na manukasi halak siirikhon-Si age pe isobut bani ayat 12, *“ai ibotoh pondok mando panorangni.”* Panorang na pondok na dimaksud aima Parnaik ni Jesus hu surga pakon parroh-Ni use laho manguhumi halak na manggoluh pakon na dob matei. Halani ai, seng onggga goluhta selaku halak na porsaya maluah humbani bagei ni parlajouan na binahen ni sibolis in. Hidup orang yang percaya tidak pernah berhenti dari gangguan iblis, hidup kita adalah “sebuah pergulatan yang terus-menerus.”

### **Kuria na hinarga ni Tuhan!**

Sonai ma realita ni goluhta selaku halak na porsaya, seng onggga maluah humbani sipanukasi na laho mambahen talu hita, mambuat hamonangan na dob ipabogehon marhitei sada sora na maling i nagori atas na mangkatahon, "Domma das sonari haluahon pakon hagogohon pakon harajaon ni Naibatanta ampa kuasa ni Kristus!" (Ay. 10).

Johannes lang patugahkon ise do na mandodingkon doding na isuratkon bani ayat 10-12. Tapi doding on marisi pasal keadaan na dob tarjadi dohonsi Kristus naik hu nagori atas janah hundul riap pakon Naibata songon na dob ipatugah bani ayat 5 pakon dob honsi sibolis idabuh hun nagori atas (ay. 8-9). Ipatugah do bahasa monang do Naibata manlawan sibolis in janah hamonangan ai ipatugah marhitei piga-piga pahara na dob tarjadi (domma das sadarion), aima: **haluahon** (Yun. *soteria*), soter; sahalak sipaluah, aima Kristus. Haluahon ai ondos pitah hubani halak na porsaya, na marsitaronon halani sipanukasi, halak na dob ipasintong janah ipadamei Kristus. Domma ondos homa **hagogohon** (Yun. *dunamis*) artini: hagogohon; kekuatan ajaib. Boi do homa iterjemahkon kemampuan, kelimpahan, kekuatan, kerja hebat (luar biasa). Tuhan do na dob mambere hagogohon hubani jolma na galek in laho mangimbang sibolis ampa dunia on. Ondos homa **harajaon ni Naibata** (Yun. *basileia*) pamarentahan Naibata, sada pamarentahan na ilahi lang duniawi songon na sinobut bani Rom 14:17, *“Ai sedo sipanganon barang siinumon harajaon ni Naibata, tapi hapintoran ampa damei ampa malas ni uhur do ibagas Tonduy Na pansing.”* Janah bani Heber 12:28 ihatahon do, *“Halani ai mangkatahon tarima kasih ma hita, ai ijalo hita do harajaon na so tardugur, anjaha ibagas ai iidangi hita ma Naibata, domu hubani rosuh-Ni, marhasoman hormat ampa biar.”* Janah na parpudi, ondos do homa banta **kuasa ni Kristus** (Yun. *exousia tou Christou autou*) sada kuasa na dob ibere hubanta.

### **Kuria na totap marporang manlawan sipanukasi!**

Age pe ronsi sonari totap ope hita marporang manlawan sipanukasi (sibolis) in, tapi domma ipatugah Naibata hubanta aha do na boi mambahen monang hita janah lobih humbani sekedar pemenang songon na sinobut apostel Paulus bani Rom 8:37-39, *“Tapi ibagas haganupan ai monang do hita halani na mangkaholongi hita ai. Tenger do uhuru, seng tarbahen sirang hita humbani holong ni uhur ni Naibata, na ibagas Kristus Jesus Tuhanta in, barang bahenon ni hamateian, barang hagoluan, barang malekat, barang siparkuasa, barang na*

*masa sonari, barang na sihol masa, barang hagogohon pe, barang bahenon ni na i atas age na i toruh, ronsi sagala na tinompa na legan pe."*

Bani ayat 11 ipatugah do tolu sinjata na dob tarbukti boi mantaluhon sipanukasi, aima: **1. Daroh ni Anak ni biri-biri in; 2. Hata na sinaksihon; pakon 3. Seng ihargahon sidea hosahni ronsi matei.** Daroh ni Anak ni biri-biri in laho patugahkon daroh ni Jesus na madurus i hayu parsilang bahen hasasapan ni dousanta. Ipapansing do hita humbani sagala dousata, itobus marhitei daroh-Ni janah jumpahan hagoluhan sisadokah ni dokahni. Halak na monang aima halak na mangkaporsayai parmateri ni Tuhan Jesus Kristus i hayu parsilang. Panobusion ni Kristus marhitei daroh-Ni, ai do bona ni hamonangan ni halak na porsaya.

On ma homa na gabe hasaksian ni halak na porsaya bani goluhni siganup ari. Ulang maila-ila hita manaksihon Jesus in ibagas goluhna. Nini bani Mateus 10:32-33, *"Ai sagala na manaksihon Ahu ilobei ni jolma, saksihonon-Ku do ai ilobei ni Bapa na i nagori atas ai, tapi sagala, na marnalang Ahu ilobei ni jolma, parnalangon-Ku do ai ilobei ni Bapa na i nagori atas ai."* Tontu hasaksianta pasal Kristus ai seng pitah marhitei hata, tapi dihut do homa marhitei pambahenan. *Orang yang menang itu bukan saja orang yang percaya kepada pengorbanan Kristus di atas kayu salib tetapi yang juga menjadi saksi pengorbanan-Nya di atas kayu salib.* Marsaksi pasal Kristus in tontu lang pahara na urah. Buei do tantangan na idompakhon hita, janah ra do magouan hosah hita halani hasaksianta ai. Tongon margogoh do dunia on laho pasedahon goluh pardagingonta, tapi lang margogoh ia pasedahon goluh haporsayaonta anggo totap hita satia manaksihon goran-Ni. Ada komitmen yang tinggi untuk tetap di jalan Tuhan sekalipun harus mengalami berbagai-bagai penderitaan karena ingin berkorban bagi Kristus.

### **Kuria na dob ipamonang Kristus!**

Age pe marhoih, marsitaronon, ronsi magouan hosah hita halani haporsayaonta hubani Kristus in, ipasir-sir Tuhan in do banta malas ni uhur, halani hita do panean pakon na marianan i nagori atas. Dodingta haleluya No. 116 mangkatahon, *"Na monang in do da use mangankon buah ni hayu hagoluhan in. Lang boi be idahonni hamagouan, 'ge hamateian paduahon in. Ai Naibatani hatundalanni mambaen langkahni tongtong torang, mambaen langkahni tongtong torang."* lontang Tuhan Jesus Kristus do hita ase dihut mandodingkon doding hamonangan ai marhitei daroh ni Anak ni biri-biri in ampa hata na sinaksihonta sonai age hasatiaanta mangirikhon-Si. Tongon hamonangan ai tarjadi halani idop ni uhur ni

Naibata marhitei na durus daroh ni Kristus. Tapi hamonangan ai boi gabe bagianta anggo ra hita marsaksi janah porsaya pasal ai. Orang-orang percaya harus merespon kasih karunia Allah dengan imannya.

Secara khusus ibagas situasi sonari on, iontang Jesus do hita ase mar-Kantate atap mandodingkon haluahon na humbani Tuhan age lape na botoh antingan salosei wabah pandemi Covid-19 on. Porsaya do hita bahasa boi do hita monang mandompakkon ai, halani domma matei Jesus janah puho humbani hamateian. Tapi haporsayaonta ai maningon do isaksihon hita homa marhitei na mematuhi haganupan singat-singat na dob ibahen pamarentahta. Maningon satia do hita menjaga jarak, i rumah gelah, ibadah i rumah, mangkorja i rumah bani na boi, pakei masker, cuci tangan, pakon tingkatkon daya tahan tubuh. Tongon haganupan ai lang pahara na urah, porlu hasabaron sonai age panrajaion diri. Tapi sada pahara na pasti, monang do hita bani ujungni. Amen.

### **12. Manggalang: (Roh ma na patumpuhon galangan hu lobei.)**

**P.** Paima ipatumpu hita galanganta, tangar hita ma lobei Hata ni Naibata na gabe onjolan banta laho manggalang, aima na tarsurat bani:

1 Kronika 29:14: *"Ai ise ma ahu, anjaha aha ma bangsangkin, ase boi hanami margugu humbani nionjar ni uhur sonin? Ai marharorohan humBamu do ganup, anjaha na humbani tangan-Mu in do na binerenami in Bamu." Sonari patumpu hita magalanganta.*

### **13. Tonggo Galangan – Panutup- Pasu-pasu**

**P.** Riap ma hita jongjong

Martonggo ma hita mangondoskon galanganta hubani Naibata!

Ham Tuhan Naibata Bapanami, Ham do na dob mambere haganup na porlu bani goluhnami. On pe, na roh do hanami hu Bamu martarimakasih anjaha mangkamalashon hata-Mu na dob ijalo hanami. Jalo Ham ma hanami ampa galangan na niondoskonami, na gabe hataridahanni hatarimakasihonami hu Bamu. Pasu-pasu Ham ma galangannami on gabe hadearon ni horja i tongah-tongah ni kuria-Mu. Sai tambahi Ham ma pasu-pasu-Mu, ase lambin margogoh hanami mangkorjahon horja na madear. Ibagas goranni Anak-Mu Jesus Kristus, Tuhan janah Sipaluah hanami. Amen!

**K.**                   *(Mandodingkon doding galangan)*  
Ganup binere-Mu in, tonduy pakon angkulangku.  
Hosah ampa gogohkin, ronsi haganup artangku.  
Huondoskon in Bamu, seng paosoronku in.

**Riap ma hita martonggo marhitei tonggo na niajarhon ni Tuhan Jesus  
hubanta:**

Ham Bapanami na i nagori atas, sai na papansing ma goran-Mu. Sai roh ma harajaon-Mu. Sai saud ma harusuh ni uhur-Mu i nagori tongah on songon na i nagori atas. Bere Ham ma bannami sadari on hagoluhan ari-ari. Sasap Ham ma dousanami songon panasapnami bani dousa ni hasoman na mardousa dampak hanami, Ulang hanami bobai Ham hu parlajouan. Paluah Ham ma hanami humbani pangangou!

***(Manoruskon tonggo on marhitei na mandodingkon)***

Ai ham do simada harajaon, pakon hagogohon, ampa hasangapon, sadokah ni dokahni. Amen.

**P.           Paingkatkon (Pengutusan)**

Laho ma nasiam, janah “ulang ma surut ringgas ni uhurnasiam, hinsah ma ibagas tonduy, sirsir ma mambalosi Tuhan in.”

**Jalo hita ma pasu-pasu humbani Tuhan Naibatanta:**

Ipasu-pasu anjaha iparorot Tuhan Naibata ma hita. Isondangkon Tuhanta Naibata ma bohi-Ni hubanta janah maidop ma uhur-Ni mangidah hita. Idompakhon Tuhan Naibata ma bohi-Ni hubanta janah ipasorap ma damei-Ni bani tonduyta bei.

**K.**           (mandodingkon) Amen..... Amen..... Amen!